

龜

巢

藁



龜巢藁卷之二十

祭文

祭姚吉甫文

嗚呼物之不齊誰其主之齒去角存從古如茲
如公之生壽富且寧不泯其胤百福具并奈何
狂飈蘭摧桂折乃館二甥以繼其絕苟非達觀
拂鬱奚堪公能釋然優游燕酣凡我親朋時相
往來有客必醉春風滿懷數日之間數往問疾
留連眷顧其情益密卜云其凶醫獲微功方疑

著龜遽爾而終嗚呼蒼天知乎不知伯道無兒
千古之悲所可慰者女能奉母歲時烝嘗亦猶
有後凡我親戚忍言長違奠此杯俾涕泗沾衣

代王文甫祭兄文

嗟我兄少歷崎嶇相我先子經營厥家自失
所怙顛危誰扶繫我與兄左枝右梧我室苟完
兄力其痛嗚呼哀哉兄於斯世閱七十年天賦
其醇朴而不鏘故此家事我其勉旃尺布斗粟
曾無間言所可喜者兄其息肩幸有二雛能奉

周旋日飲無何睥、其天意此安佚壽或可延
奈何既衰屢疾屢痊絕粒信宿晞露溘然嗚呼
哀哉誰無兄弟我獨孤苦顧二雖耆視子猶父
我嘗勗之以續先緒天心以辭酸淚如雨

代祭子文

嗚呼天降禍于我家何其酷耶我生勞、髮已
垂白異汝冢子仰事俯育以續先緒汝年既長
頗涉世故與汝諸弟左枝右梧我經爾緯我作
爾述知稼穡之艱難未嘗敢慢而敢逸也維汝

多病常貽我憂去歲仲冬幾致弗救厥疾既愈
我心則喜然未嘗假以詞色寔慮汝因疾之餘
弛而弗張馴致怠荒故也正月之吉我適錢塘
別方兩旬計音忽至將信將疑屢泣屢止意汝
暴疾氣或絕而復蘇聲或喑而再語匍匐來歸
汝簣已易汝棺已歛無從見汝之面矣可不痛
哉可不痛哉嗚呼彼蒼者天我罪何居人或釋
之子淵之天顏路何辜信乎脩短之有數耶天
道之茫、耶不然何乃使汝不得其壽也嗚呼

汝子汝女嫡庶五人女嫁其一子皆未婚汝何
忍置之不顧耶食指之衆賦役之重又何忍老
父無息肩之日耶死而有知汝必念我于冥
之中而我之所以念汝者將何時而已耶嗚呼
痛哉我築之室汝弗與居汝蓄之器用以祭汝
今卜日祔葬汝祖塋之側撰此飲食與之永訣
汝妻汝孥哀慟欲絕

代王氏祭叔父文

嗚呼痛哉我叔父春秋七十有二年始于承家

中於克家終於成家其劬瘁艱苦非諸幼所能
盡知也但見完美之室風雨不動衡石其晦阡
陌相連男有室而女有家水乘舟而陸乘馬非
叔父積累之功何以得此哉至如目能識丁皆
叔父延師之力也行不犯義皆叔父提耳之訓
也一家之間總服同爨以叔父之恩無偏情無
私囑之威嚴不可犯故能齊其不齊以致其
齊耳嗚呼痛哉庭訓之言萬千今不能盡
述矣如南塾篝燈東軒奉茗嘗屢進。等於前

而語之曰我兄弟自生至死未嘗有鬩牆之日也老我夫婦自少至老無牝晨之患也隣不爭畔帑無私蓄許人以諾不食其言鈎距不知掊克不能汝等亦能如是乎凡此數事反復告戒知幾朝夕令其已矣斯言不可得而聞矣而等為之子為之侄為之孫者可不追念貽謀而踐其成法乎否則為叔父之辱親朋之訕鄉里之笑天地間之罪人也嗚呼痛哉去年先人皆謂叔父豐鏢其壽未艾也孰意數月之頃視則

眊焉聽則瞶焉筋力索焉方病而紅寇入室病
愈而租吏打門百憂感心二豎成而等猶
以醫藥可恃而不惧也詎意遽至是耶嗚呼痛
哉教育之恩固不能報其萬一但速葬以遵治
命如此永別之悲五內加割泣血一酬惟以告
哀嗚呼痛哉尚饗

代周華甫祭伯文

昔我先人早棄諸孤所恃兩伯其一復徂歸然
獨存山澤之癯憐我兄弟教之友于雖異厥居

有無相須撫之愛之與子不殊奉承周旋匪朝
伊晡階庭之間言笑怡懌小過弗責曲禮弗拘
叱咤之聲罔及僕夫鄉稱善人久矣不誣年踰
八秩健飯為娛詎意一疾竟若摧枯由茲而往
誨言則無疑難誰質顛危誰扶寧不使我哀號
痛呼伯弓伯弓死不復蘇薄陳簋簋清酒一壺
收淚永訣靈其鑒諸

代祭吳間真人文

玄元之學世遠言湮不有先覺孰貽後人伊昔

上卿道契世皇手持玄珠光明四方吾師繼之
山鳴谷應弘道累朝維清維寧帝錫之爵羽節
霓旌邀乎高風崆峒廣成出入西垣在帝左右
黼黻皇猷厥功亦懋名日益重德日益尊世則
賴之以棟玄門豈不懷歸怡雲舊隴勇退弗獲
祗承天寵間々之情聖皇亦知大書

所思奎畫煥然寶翫無斲瓊館逍遙
以永朝夕胡厰斯世遽遊鬱羅哀聞九重傷如
之何我諸葛翁嗣法之孫如牛馬走忝為後昆

舐鼎而僂雞犬弗及寓哀茲觴無任於悵

為亮西山祭光祖庭文

生必有死斯理焯々況我釋氏以滅為樂獨于
交情寔不能無若我與君忘之可乎昔在光孝
親如葭莩承平異處患難相扶故山丘墟避地
東吳未幾言還如絃如夔銅馬西來猛于騏驎
再涉大江九人與俱披榛門道體無完膚既脫
虎口猶虞畏途我二人者始終持扶白茆宵征
狐嘯鬼哭磧沙遇舊廼衣廼鋪萍聚雲散連年

海隅每一握手猶論毒痛惟暮之秋以予起甃
爰繼我師踞天惠室與君相依鐘鼓朝夕平居
論道風飛電激方期進修各殫其力君遽云亡
必樂於寂我失良友是用悽惻溪毛之薦諒維
來格

祭沈仁齋文

天道何茫茫耶顏氏之永仁不永其年柳跖之
暴壽何以延豈有生之初氣稟其偏乎抑蜉蝣
朝暮蟪蛄春秋一皆聽其自然乎如君之生洵

美且都鄉閭共稱吉人之徒蚤歲失怙藐焉而
孤仰事悅育綽乎有餘若騏驎之夙駕且能範
乎馳驅每遊四方以廣其居安知信宿之先方
歸覲省一別之後遽疾而殂嗚呼哀哉倚門之
母其望懸、垂髻兩兒其泣漣、鵠原永嘆寫
鏡莫圓德哉若人何辜于天如、等葭莩之親
情猶骨肉既不及匍匐而往救徒號呼而頓足
旅櫬未歸橫山埋玉頤彭傷之不齊信斯理之
難燭清縣以詞酸淚盈掬

為葛子寧祭父文

嗚呼天乎人孰無父獨不假我父之年遽止是
耶在昔家居仰事俯育以大父遺業之重隻力
負荷常惧弗克所樂者惟琴惟書是吟詠而已
餘無所嗜好也嗚之聲弗及犬馬姻族間里
咸薰其良善人之稱無間然者數年以來遭時
艱棘流離異鄉食指百餘賴父全活亦豈易為
然耶嗚呼痛哉時之避難者妻孥啼號或委溝
壑我父則旁求治生之術使母與等無凍餒

之憂也時之人居無室廬或冒風雨我父則納
交仗義之士使母與一等得居處之安也至若
族有孤寒之胤家有臧獲之衆亦莫不愛之如
骨肉然搢紳之士多與莫逆葭莩之親相與依
倚但不肖孤不能幹盡負義方之訓為多然我
父之慈訓未嘗不勤一也今也一疾遽尔大故
頓一等為孤為嫠者真若喪家之狗失水之魚
矣嗚呼蒼天其無知乎如其有知視孤嫠之悲
若此而不為之憫遺乎然而悲則悲矣猶有可